

**13 october 2022**

## **La ruina Tschanüff es üna perdütta istorica variada**

L'istoriker Jon Mathieu ha referi a Ramosch davart l'istorgia da la ruina Tschanüff. L'occurrenza es gnüda organisada da l'ACEB. Tocs da lain illa müraglia da la ruina dateschan dal 957 e dal 1728 es crodada üna part dal chastè da Tschanüff illa chavorgia da la Brancla. Il nom da la famiglia Planta da Zuoz es fermamaing collià cun Tschanüff.



La ruina da Tschanüff  
•foto: mad

**29 october 2022**

## **«Eau sun satisfatta cha'l post rumauntsch vain occupo inavaunt.»**

Düraunt 25 ans es la romanista Annetta Ganzoni da Berna e da Schlarigna steda collauratura scientifica al Archiv svizzer da litteratura (ASL) ed ella d'eira responsabla in quist archiv per la collecziun rumauntscha e per part eir quella taliauna. A la fin d'october es ella ida in pensiun. La Rumantschia es grata per sia granda lavur prusteda.



Annetta Ganzoni  
•foto: Gianna Duschletta

**29 october 2022**

## **Record mundiel da la Ferrovia Retica sül traged da l'Alvra**

La fin d'october d'eiran ils ögls dal muond drizzos vers il Grischun. Ün tren da 25 cumposiziuns a 4 vaguns collios ad üna lungezza da 2 kilometers s'ho stortiglio tres ils tunnels a spirala e sur ils viaducts da la lingia da l'Alvra traunter Pre-da e Chastè. Uschè als es reuschieu ün record mundiel chi faro buna reclama sün tuot il muond per noissa «Pitschna Cotschna».



VR traunter Preda e Bravuogn  
•foto: www.swiss-image.ch/gorhbevent

**5 november 2022**

## **Dis da litteratura a Domat – Flurina Badel guadogna il premi Term Bel**

L'autura ed artista engiadinaisa Flurina Badel da Guarda guadogna quist on tant il premi da la giuria sco eir quel dal public. Tenor la giuria ha seis «Be calm» persvas cun sia lingua poetica e sias associazions expressivas. Il text da l'autura ladina es ün monolog intern ed ella svessa es fich grata cha seis text ha persvas a la giuria ed al publicum.



Flurina Badel •foto: RTR

**17 november 2022**

## **Ün cor armonic e fascinant daspö decennis**

Mincha 5 ans invidan «Las Lodosas» ad ün concert da giubileum. Werner Steidle, il grand maestro, dirigia a sieus homens già daspö 35 ans. Il cor «Las Lodosas» nun es be cuntschaint tar nus co in terra ladina ma eir sur ils cunfins our. Lur repertoire es fich vario ed ils chantadurs chauntan tuot lur program sainza notas. Che cha que voul dir so minchün: a chi chaunta in ün cor.



Vaira utschels, ün pü bel cu l'oter  
•foto: Las Lodosas

**21 november 2022**

## **Clementina Gilly, la pioniera chi'd es ida in schmanciaunza**

Cun l'ouvrä «Fruonzla» d'eira Clementina Gilly dal 1926 la prüma duonna chi ho publicho ün cudesch in rumauntsch. La poetessa e pioniera dal muviment feminist es morta in november dal 1942 a Zuoz, dimena avaunt 80 ans. Ün nouv cudesch la dess uossa mner inavous illa memüergia collectiva.



Rico Valär düraunt la preschantaziun dal cudesch •foto: Mayk Wendt